

ინსტრუქცია კენჭისყრის დღის

პროცედურების შესახებ

I. უბნის გახსნიდან კენჭისყრის დაწყებამდე

კენჭისყრის დღეს საარჩევნო უბანი იხსნება 07:00 საათზე, რაც გახსნისთანავე უნდა ეცნობოს ზემდგომ საოლქო საარჩევნო კომისიას.

თუ კენჭისყრის დღეს, 8:00 საათისთვის კომისიის წევრთა რაოდენობა 5-ზე ნაკლები აღმოჩნდა, კენჭისყრა არ იწყება.

საუბნო საარჩევნო კომისიის ყველა წევრს უნდა ეკეთოს კომისიის წევრის სამკერდე ნიშანი (მოწმობა). საუბნო საარჩევნო კომისიის თავმჯდომარემ დამკვირვებლებს, საარჩევნო სუბიექტების და პრესისა და მასობრივი ინფორმაციის საშუალებების წარმომადგენლებს უნდა მოსთხოვოს შესაბამისი სააკრედიტაციო მოწმობები, რომელიც იმავდროულად წარმოადგენს სამკერდე ნიშანს.

კომისიის თავმჯდომარე საარჩევნო უბნის გახსნისთანავე ჩანაწერთა წიგნს გადასცემს საუბნო საარჩევნო კომისიის მდივანს, რომელსაც პირველ და მეორე გვერდებზე შეაქვს კენჭისყრის შენობაში მყოფი საუბნო საარჩევნო კომისიის წევრების და კენჭისყრის შენობაში ყოფნის უფლების მქონე ყველა პირის მონაცემები და ხელმოწერით ამოწმებინებს.

კომისიის თავმჯდომარე კომისიის მდივანს ასევე გადასცემს კენჭისყრის შედეგების შემაჯამებელი ოქმების ბლოკნოტებს და სადემონსტრაციო ოქმებს. კომისიის მდივანი ავსებს კენჭისყრის შედეგების შემაჯამებელი ოქმის ბლოკნოტის ყდის უკანა ფურცელს. სადემონსტრაციო ოქმები თვალსაჩინო ადგილას (კომისიის მდივნის მაგიდის სიახლოვეს) უნდა გამოიკრას. კომისიის მდივანი ასევე აწარმოებს სარეგისტრაციო ჟურნალს.

წილისყრის ჩატარებამდე საუბნო საარჩევნო კომისიის თავმჯდომარე ამოწმებს იმ დალუქული პაკეტის მთლიანობას, რომელშიც მოთავსებულია საუბნო საარჩევნო კომისიის სპეციალური ბეჭედი და ხსნის მას.

II. წილისყრა

პირველ რიგში წილისყრა ტარდება პარტიების მიერ დანიშნულ წევრებს შორის გადასატანი ყუთის წამლები 2 წევრის გამოსავლენად (თუ უბანზე შედგენილია სიის დანართი).

ამის შემდეგ საუბნო საარჩევნო კომისიის დანარჩენ წევრებს შორის წილისყრით ნაწილდება შემდეგი ფუნქციები:

- ამომრჩეველთა რეგისტრატორი (ერთი წევრი ყოველ 300 ამომრჩეველზე)
- საარჩევნო ყუთისა და კონვერტების ზედამხედველი;
- ამომრჩეველთა ნაკადის მომწესრიგებელი კომისიის წევრი, რომელიც აგრეთვე ამოწმებს ამომრჩეველთა მარკირებას.

წილისყრაში მონაწილეობას არ იღებენ კომისიის თავმჯდომარე, თავმჯდომარის მოადგილე და მდივანი. კომისიის მდივანმა წილისყრის შედეგად გადანაწილებული ფუნქციები უნდა შეიტანოს ჩანაწერთა წიგნის მე-3 გვერდზე.

კომისიის თავმჯდომარის ნებართვით, წილისყრის შედეგად გამოვლენილი კომისიის წევრის ფუნქცია დროებით შეიძლება დაეკისროს კომისიის სხვა წევრს, რაც კომისიის მდივანმა ჩანაწერთა წიგნის მე-5 გვერდზე დროის მითითებით უნდა აღნიშნოს.

III. ამომრჩეველთა რაოდენობის, მიღებული საარჩევნო ბიულეტენებისა და კონვერტების რაოდენობის გამოცხადება

წილისყრის შემდეგ საუბნო საარჩევნო კომისიის თავმჯდომარე აცხადებს ამომრჩეველთა რაოდენობას ამომრჩეველთა ერთიანი და სპეციალური სიების, აგრეთვე ამომრჩეველთა სიის დანართის მიხედვით. შესაბამისი მონაცემები საუბნო საარჩევნო კომისიის მდივანს დაუყოვნებლივ შეაქვს კენჭისყრის დღის ჩანაწერთა წიგნში, სადემონსტრაციო ოქმებსა და კენჭისყრის შედეგების შემაჯამებელი ოქმებში.

კომისიის თავმჯდომარე მიღება-ჩაბარების აქტის საფუძველზე, ამოწმებს და აცხადებს მიღებული საარჩევნო ბიულეტენების, სპეციალური კონვერტების რაოდენობას. მიღებული

ბიულეტენების რაოდენობა საუბნო საარჩევნო კომისიის მდივანს დაუყოვნებლივ შეაქვს კენჭისყრის დღის ჩანაწერთა წიგნში, სადემონსტრაციო ოქმსა და კენჭისყრის შედეგების შემაჯამებელ ოქმებში.

IV. კენჭისყრის პროცედურისთვის საჭირო მასალების გადაცემა კომისიის წევრებისთვის

კომისიის თავმჯდომარე ამომრჩეველთა რეგისტრატორებს გადასცემს:

ამომრჩეველთა ერთიან სიას, რომელიც თითოეული რეგისტრატორისათვის გადაცემული ანბანური თანმიმდევრობის მიხედვით შესაბამისი რეგისტრატორის სახელისა და გვარის გასწვრივ მდივნის მიერ შეიტანება ჩანაწერთა წიგნის მე-3 გვერდზე; (თავმჯდომარემ თითოეულ სარეგისტრაციო მაგიდასთან უნდა გამოაკრას ამომრჩეველთა გვარების ანბანური თანმიმდევრობა მაგიდაზე განლაგებული სიების შესაბამისად);

ამომრჩეველთა სპეციალურ სიას გადასცემს ერთ-ერთ რეგისტრატორს;

საარჩევნო ბიულეტენების თითო ბლოკნოტს; (კომისიის თავმჯდომარე და მიმღები რეგისტრატორები ბლოკნოტების თავფურცელზე ხელმოწერით ადასტურებენ ბიულეტენების მიღება-ჩაბარებას);

კომისიის თავმჯდომარე, რეგისტრატორის ბეჭდებს ათავსებს გადასატან საარჩევნო ყუთში, რეგისტრატორები ყუთიდან სათითაოდ იღებენ ერთ ბეჭედს, რომლის კოდიც კომისიის მდივანს შეაქვს ჩანაწერთა წიგნის მე-3 გვერდზე. შემდეგ გადასცემს მარკირების სითხეს (თითოეულ რეგისტრატორს).

კომისიის თავმჯდომარე ამომრჩეველთა ნაკადის მომწესრიგებელ კომისიის წევრს გადასცემს მარკირების შესამოწმებელ ულტრაიისფერ ფარანს.

კომისიის თავმჯდომარე საარჩევნო ყუთისა და სპეციალური კონვერტების ზედამხედველ კომისიის წევრს გადასცემს სპეციალურ კონვერტებს და ძირითად საარჩევნო ყუთს.

V. საარჩევნო ყუთების დალუქვა

პირველი ამომრჩევლის მოსვლის შემდეგ (მაგრამ არა უადრეს 08:00 საათისა), საუბნო საარჩევნო კომისიის თავმჯდომარე საარჩევნო დოკუმენტაციიდან იღებს სამ საკონტროლო ფურცელს და შესავსებად გადასცემს საუბნო საარჩევნო კომისიის მდივანს.

საკონტროლო ფურცლის შევსებამდე, პირველმა ამომრჩეველმა უნდა გაიაროს რეგისტრაცია ამომრჩეველთა სიაში. საკონტროლო ფურცელი მხოლოდ მას შემდეგ ივსება, რაც დადასტურდება, რომ პირველი ამომრჩევლის რეგისტრაციის ადგილი მიეკუთვნება მოცემული საარჩევნო უბნის საზღვრებს.

თითოეულ საკონტროლო ფურცელში შეიტანება:

პირველი ამომრჩევლის სახელი და გვარი; რეგისტრაციის ადგილი; პირადობის მოწმობისა და პირადი ნომერი (ან საქართველოს მოქალაქის პასპორტის ნომერი); საკონტროლო ფურცლების საარჩევნო ყუთებში ჩაშვების ზუსტი დრო.

საკონტროლო ფურცლებს ხელს აწერენ პირველი ამომრჩეველი და საუბნო საარჩევნო კომისიის ყველა დამსწრე წევრი. კომისიის მდივანი ჩანაწერთა წიგნის მე-4 გვერდზე მიუთითებს საკონტროლო ფურცელში შეტანილ მონაცემებს.

საუბნო საარჩევნო კომისიის თავმჯდომარე ამოწმებს და ლუქავს ძირითად და გადასატან საარჩევნო ყუთებს ინდივიდუალური ნომრის მქონე ზონრით, რომლის ნომერი საარჩევნო კომისიის მდივანს შეაქვს კენჭისყრის დღის ჩანაწერთა წიგნის მე-4 გვერდზე.

საარჩევნო ყუთების დალუქვისთანავე, საუბნო საარჩევნო კომისიის თავმჯდომარე ძირითად და გადასატან ყუთებში ათავსებს საკონტროლო ფურცლებს. საკონტროლო ფურცლის ერთ ცალს ინახავს საუბნო საარჩევნო კომისიის თავმჯდომარე, საარჩევნო ყუთის გახსნის შემდეგ მათში არსებულ საკონტროლო ფურცლებთან შედარების მიზნით.

კენჭისყრის პროცესი

VI. კენჭისყრის პროცესის მიმდინარეობა

კენჭისყრაში ამომრჩეველთა მონაწილეობის მიზნით საუბნო საარჩევნო კომისია ზედამხედველობს და ასრულებს შემდეგ პროცედურებს:

ნაკადის მომწესრიგებელი კომისიის წევრი სთხოვს რიგში მდგომ ამომრჩეველს აჩვენოს პირადობის დამადასტურებელი საბუთი (პირადობის მოწმობა ან პასპორტი). ამის შემდეგ, ულტრაიისფერი ფარნით ამოწმებს აღნიშნება თუ არა ამომრჩეველს მარკირება და მიუთითებს ამომრჩეველს, მივიდეს შესაბამის სარეგისტრაციო მაგიდასთან;

რეგისტრატორი სთხოვს ამომრჩეველს საქართველოს მოქალაქის პირადობის მოწმობას ან საქართველოს მოქალაქის პასპორტს, მოძებნის ამომრჩეველს ერთიან ან სპეციალურ სიებში და ახდენს ამომრჩეველის მარკირებას; ამის შემდეგ ამოწმებს ამომრჩეველის პირად ნომერს (პირადი ნომერი ჩაბეჭდილია სამაგიდო სიაში); ხელმოწერით და რეგისტრატორის ბეჭდით ამოწმებს საარჩევნო ბიულეტენს და ადასტურებს ბიულეტენის გაცემას ამომრჩეველთა სიაში ხელმოწერით; შემდგომ თავად ამომრჩეველს ხელს აწერინებს სიაში თავისი გვარის გასწვრივ და გადასცემს დამოწმებულ საარჩევნო ბიულეტენებს.

საარჩევნო ყუთისა და კონვერტების ხელამხედველი კომისიის წევრი ვალდებულია მუდმივად აკონტროლოს საარჩევნო ყუთი, არ დაუშვას საარჩევნო ყუთთან ერთდროულად ერთზე მეტი ამომრჩეველის მისვლა. მას დახურული უნდა ჰქონდეს კონვერტის ჩასაგდები ჭრილი და იგი უნდა გახსნას მხოლოდ მას შემდეგ, როდესაც დარწმუნდება, რომ ამომრჩეველს ხელში მხოლოდ ერთი კონვერტი აქვს.

კენჭისყრაში მონაწილე ამომრჩეველთა აღრიცხვა

კენჭისყრის დღეს ამომრჩეველთა აქტივობის განსასაზღვრად, კომისიის მდივანი ვალდებულია კენჭისყრის დღეს ორჯერ (12:00სთ, 17:00სთ) გადათვალოს ამომრჩეველთა სიებში კენჭისყრის მონაწილე ამომრჩეველთა ხელმოწერების რაოდენობას.

კომისიის მდივანს დაფიქსირებული მონაცემები შეაქვს კენჭისყრის შედეგების შემჯამებელ ოქმში, სადემონსტრაციო ოქმსა და კენჭისყრის დღის ჩანაწერთა წიგნში. კომისიის თავმჯდომარე 12:00 სთ და 17:00 საათის ინფორმაციას კენჭისყრაში მონაწილეთა შესახებ აცნობებს საოქმეო საარჩევნო კომისიას.

VII. გადასატანი საარჩევნო ყუთის საზუსტოპიზით ხმის მიცემა

კენჭისყრის დღის 9 საათიდან საუბნო საარჩევნო კომისიის თავმჯდომარე წილისყრით გამოვლენილ გადასატანი საარჩევნო ყუთის თანმხლებ კომისიის 2 წევრს გადასცემს:

- ამომრჩეველთა სიის დანართს (გადასატანი საარჩევნო ყუთის სიას)
- რეგისტრატორის მიერ ხელმოწერითა და სპეციალური ბეჭდით დამოწმებულ საარჩევნო ბიულეტენების საჭირო რაოდენობას (თავმჯდომარემ უნდა გაითვალისწინოს ბიულეტენების გაფუჭების შესაძლებლობა) და სპეციალურ კონვერტებს (კომისიის მდივანმა ჩანაწერთა წიგნის მე-4 გვერდზე უნდა აღნიშნოს, რამდენი ბიულეტენი და სპეციალური კონვერტი გადაეცა გადასატანი საარჩევნო ყუთის თანმხლებ კომისიის წევრს)
- დალუქულ გადასატან საარჩევნო ყუთს, რომელშიც მოთავსებულია საკონტროლო ფურცელი.

გადასატანი საარჩევნო ყუთით კენჭისყრა მთავრდება 19:00 საათზე. კენჭისყრის დამთავრების შემდეგ დაუყოვნებლივ ილუქება საარჩევნო ყუთში სპეციალური კონვერტის ჩასაგდები ჭრილი. კენჭისყრის დღის არა უგვიანეს 20:00 საათისა გადასატანი საარჩევნო ყუთი უნდა დაბრუნდეს კენჭისყრის შენობაში.

გადასატანი საარჩევნო ყუთის თანმხლებმა კომისიის წევრმა (კენჭისყრის შენობაში დაბრუნების შემდეგ) საუბნო საარჩევნო კომისიის მდივანს უნდა გადასცეს გამოუყენებელი ბიულეტენები. კომისიის მდივანმა ასეთ ბიულეტენებს უნდა ჩამოაჭრას კუთხე, დააწეროს “გაფუჭებული” და კომისიის თავმჯდომარის ხელმოწერის შემდეგ, კენჭისყრის დასრულებამდე შეინახოს.

VIII. საარჩევნო უბნის დახურვა

ზუსტად 20:00 საათზე კენჭისყრის შენობა იკეტება. ამ დროისთვის რიგში მდგომ ამომრჩეველებს შეუძლიათ ხმის მიცემა. საუბნო საარჩევნო კომისიის თავმჯდომარის დაჯალბით, კომისიის ერთ-ერთი წევრი ჩანაწერთა წიგნში აღნიშნავს რიგში მდგომი ამომრჩეველების რაოდენობას, მათ გვარებსა და სახელებს და ამ მონაცემებს აცნობებს საუბნო საარჩევნო კომისიის თავმჯდომარეს, რომელიც გამოაცხადებს, რომ კენჭისყრაში მონაწილეობა შეუძლიათ მხოლოდ რიგში მდგომ ამომრჩეველებს. თუ კენჭისყრის ოთახი იძლევა ამის საშუალებას, რიგში მდგომი უკვე აღრიცხული ამომრჩეველები უნდა შემოიყვანოს კენჭისყრის ოთახში და ჩაკეტოს კენჭისყრის შენობა.

კენჭისყრის დამთავრების შემდეგ საარჩევნო ყუთში სპეციალური კონვერტის ჩასაგდება ჭრილი ილუქება.

როგორც კი ბოლო ამომრჩეველი მისცემს ხმას, საუბნო საარჩევნო კომისიის თავმჯდომარემ უნდა უზრუნველყოს, რომ ყველა პირმა, კენჭისყრის შენობაში ყოფნის უფლების მქონე პირების გარდა, დატოვოს კენჭისყრის შენობა.

კენჭისყრის უწყვეტობა

IX. საარჩევნო ყუთის გახსნამდე ჩასატარებელი პროცედურები

საუბნო საარჩევნო კომისიის თავმჯდომარე კომისიის წევრებისგან წილისყრით ავლენს არანაკლებ 3 მთვლელს (მთვლელების გამოვლენის მიზნით, წილისყრა ტარდება იმავე წესით, როგორც კენჭისყრის დაწყებამდე კომისიის წევრთა შორის ფუნქციების განაწილებისას. წილისყრისთვის განკუთვნილ ფურცლებზე მითითებული უნდა იყოს “პირველი მთვლეელი”, “მეორე მთვლეელი”, “მესამე მთვლეელი”). წილისყრის შედეგები კომისიის მდივანს შეაქვს ჩანაწერთა წიგნის მე-3 გვერდზე.

საარჩევნო უბანში მყოფმა დამკვირვებლებმა ურთიერთშეთანხმებით უნდა შეარჩიონ ორი მეთვალყურე, რომლებიც დააკვირდებიან ხმების დათვლის პროცედურას მთვლელების გვერდით, ხოლო კენჭისყრის შენობაში ყოფნის უფლების მქონე დანარჩენი პირები მთვლელებისგან ერთი მეტრის დაშორებით უნდა იმყოფებოდნენ. თუ დამკვირვებლებმა ურთიერთშეთანხმებით ვერ შეარჩიეს 2 მეთვალყურე, საუბნო საარჩევნო კომისიის თავმჯდომარე კენჭისყრის შენობაში მყოფი დამკვირვებლებისაგან წილისყრით გამოავლენს 2 მეთვალყურეს.

საარჩევნო ყუთის გახსნამდე მთვლელები ითვლიან:

ამომრჩეველთა ხელმოწერების რაოდენობას ამომრჩეველთა ერთიან სიაში, სპეციალურ სიაში, ამომრჩეველთა სიის დანართში.

გამოუყენებელი საარჩევნო ბიულეტენების რაოდენობას;

გაფუჭებული საარჩევნო ბიულეტენების რაოდენობას.

ზემოჩამოთვლილი მონაცემები კომისიის მდივანს თანმიმდევრულად შეაქვს ჩანაწერთა წიგნსა და სადემონსტრაციო ოქმში.

საარჩევნო ყუთის გახსნამდე მთვლელები ლუქავენ:

I. ამომრჩეველთა ერთიან სიას, სპეციალურ სიას და ამომრჩეველთა სიის დანართს ცალ-ცალკე. პაკეტს ზემოდან ეწერება საარჩევნო დოკუმენტაციის სახეობა, საარჩევნო ოლქისა და უბნის ნომერი. კონვერტს ხელს აწერენ მთვლელები და კომისიის თავმჯდომარე.

II. გაფუჭებულ საარჩევნო ბიულეტენებს. კონვერტის თავფურცელზე იწერება არჩევნების სახეობა „გაფუჭებული საარჩევნო ბიულეტენები“, პაკეტში მოთავსებული ბიულეტენების რაოდენობა, საარჩევნო ოლქის და უბნის ნომერი. პაკეტს ხელს აწერენ მთვლელები და კომისიის თავმჯდომარე.

III. გამოუყენებელი საარჩევნო ბიულეტენებს და შესაბამის ბლოკნოტებს. პაკეტის თავფურცელზე იწერება არჩევნების სახეობა, „გამოუყენებელი საარჩევნო ბიულეტენები“, პაკეტში მოთავსებული ბიულეტენების რაოდენობა, საარჩევნო ოლქის და უბნის ნომერი. პაკეტს ხელს აწერენ მთვლელები და კომისიის თავმჯდომარე.

X. საარჩევნო ყუთების გახსნა

პირველად იხსნება გადასატანი საარჩევნო ყუთი.

გადასატანი საარჩევნო ყუთის გახსნის მიზნით კომისიის თავმჯდომარე ატარებს შემდეგ პროცედურას:

კომისიის წევრებისა და კენჭისყრის შენობაში ყოფნის უფლების მქონე პირთა თანდასწრებით ამოწმებს გადასატანი საარჩევნო ყუთის ლუქის მთლიანობას და ლუქის ნომერს ადარებს კენჭისყრის დღის ჩანაწერთა წიგნში მითითებულ ნომერს.

გადასატანი საარჩევნო ყუთის გახსნის შემდეგ მთვლელები ამოწმებენ საკონტროლო ფურცლის არსებობას და მას უდარებენ საუბნო საარჩევნო კომისიაში შენახულ საკონტროლო ფურცელს;

თავმჯდომარე ადარებს გადასატან საარჩევნო ყუთში აღმოჩენილი კონვერტების რაოდენობას და ამომრჩეველთა სიის დანართში ამომრჩეველთა ხელმოწერების რაოდენობას.

ძირითადი საარჩევნო ყუთის გახსნის მიზნით კომისიის თავმჯდომარე ატარებს შემდეგ პროცედურას:

კომისიის წევრებისა და კენჭისყრის შენობაში ყოფნის უფლების მქონე პირთა თანდასწრებით ამოწმებს ძირითადი საარჩევნო ყუთის ლუქის მთლიანობას და ლუქის ნომერს ადარებს კენჭისყრის დღის ჩანაწერთა წიგნში მითითებულ ნომერს.

ძირითადი საარჩევნო ყუთის გახსნის შემდეგ მთვლელები ამოწმებენ საკონტროლო ფურცლის არსებობას და მას უდარებენ საუბნო საარჩევნო კომისიაში შენახულ საკონტროლო ფურცელს;

მთვლელები ერთმანეთში ურევენ ძირითადი და გადასატანი საარჩევნო ყუთებიდან გადმოყრილ სპეციალურ კონვერტებს და იწყებენ საარჩევნო ბიულეტენების დათვლას.

ხმის დათვლა და შედეგების შეჯამება

XI. საარჩევნო ბიულეტენების დახარისხება, დათვლა

პირველი მთვლელი სპეციალური კონვერტიდან იღებს საარჩევნო ბიულეტენს, აცხადებს, ვისთვისაა მიცემული ხმა და საარჩევნო ბიულეტენს გადასცემს მეორე მთვლელს, ხოლო სპეციალურ კონვერტს დებს ცალკე. მთვლელები საარჩევნო ბიულეტენებს აწყობენ ცალ-ცალკე, თითოეული საარჩევნო სუბიექტებისთვის მიცემული ხმების შესაბამისად.

ცალკე ეწყობა დაუდგენელი ნიმუშის და მთვლელების მიერ ბათილად მიჩნეული საარჩევნო ბიულეტენები, ცალკე – საარჩევნო ბიულეტენები, რომელთა ნამდვილობაც საეჭვოდ იქნა მიჩნეული.

საარჩევნო ბიულეტენების დახარისხების დასრულების შემდეგ, კომისიის წევრები კენჭისყრით გადაწყვეტენ საეჭვოდ მიჩნეული ბიულეტენების ნამდვილობის საკითხს. ნამდვილად მიჩნეული საარჩევნო ბიულეტენი ემატება ნამდვილი ბიულეტენების დასტას, ხოლო ბათილად მიჩნეული საარჩევნო ბიულეტენი - ბათილად მიჩნეული საარჩევნო ბიულეტენების დასტას.

ბიულეტენების დახარისხების შემდეგ კომისიის თავმჯდომარე მთვლელებს მიუთითებს დაითვალონ თითოეული საარჩევნო სუბიექტისთვის მიცემულ ხმათა რაოდენობა.

პირველი და მეორე მთვლელები ითვლიან დახარისხებულ საარჩევნო ბიულეტენებს და აწყობენ ათ-ათ ცალად ერთმანეთზე ჯვარედინად. მესამე მთვლელი ხელახლა ითვლის/ამოწმებს ათ-ათ ცალად დაწყობილ საარჩევნო ბიულეტენებს,

ამის შემდეგ ითვლება ბათილად მიჩნეული ბიულეტენები და ზემოდან ეწერება “ბათილია” და ხელს აწერენ მთვლელები და კომისიის თავმჯდომარე ეს ბიულეტენები პაკეტად იკვრება და მათ რაოდენობას საუბნო საარჩევნო კომისიის მდივანი დაუყოვნებლივ აღნიშნავს სადემონსტრაციო ოქმსა და ჩანაწერთა წიგნში.

ხმების დათვლის დასრულების შემდეგ კომისიის თავმჯდომარე აცხადებს თითოეული საარჩევნო სუბიექტის მიერ მიღებული ხმების რაოდენობას. კომისიის მდივანს ეს მონაცემები დაუყოვნებლივ შეაქვს კენჭისყრის დღის ჩანაწერთა წიგნში, სადემონსტრაციო ოქმებში, კენჭისყრის შედეგების შემჯამებელ ოქმებში.

XII. საარჩევნო დოკუმენტაციის შეგროვა და დალუქვა

საარჩევნო ბიულეტენების დათვლის შემდეგ მთვლელები კრავენ და ლუქავენ:

ბათილ საარჩევნო ბიულეტენებს; სხვა საარჩევნო უბნისთვის განკუთვნილი ბათილი ბიულეტენები ცალკე პაკეტად იკვრება და მათი რაოდენობა აღინიშნება მხოლოდ ჩანაწერთა წიგნში. მთვლელებმა შეეკრას უნდა დააწერონ არჩევნების სახეობა, საარჩევნო დოკუმენტაციის სახეობა (ბათილი საარჩევნო ბიულეტენები), შეეკრაში მოთავსებული ბიულეტენების რაოდენობა, საარჩევნო ოლქის და უბნის ნომერი. შეეკრას ხელს აწერენ მთვლელები და კომისიის თავმჯდომარე;

საარჩევნო სუბიექტების მიერ მიღებულ ხმებს/საარჩევნო ბიულეტენებს; ყოველი 10 საარჩევნო ბიულეტენი იკვრება ლითონის შემკრეელით („სტეპლერით“). ყოველ შეეკრას, როგორც სრულს, ისე არასრულს, ზემოდან ეწერება შეკრული საარჩევნო ბიულეტენების რაოდენობა. საარჩევნო სუბიექტების მიერ მიღებული ხმები/საარჩევნო ბიულეტენები იკვრება ცალ-ცალკე.

თითოეულ შეკვრას მთვლელებმა უნდა დააწერონ არჩევების სახეობა, საარჩევნო სუბიექტის დასახელება, სუბიექტის მიერ მიღებული ხმების რაოდენობა, საარჩევნო ოლქის და უბნის ნომერი. შეკვრას ხელს აწერენ მთვლელები და კომისიის თავმჯდომარე;

საარჩევნო ბიულეტენების ყოველი შეკვრა იფუთება და ილუქება იმგვარად, რომ ბეჭდის დაუზიანებლად შეუძლებელი იყოს შეკვრიდან ბიულეტენის ამოღება ან ჩადება.

XIII. კენჭისყრის შედეგების შემაჯამებელი ოქმის შედგენა

საქართველოს პარლამენტის შუალედური არჩევნების დროს დგება 1 შემაჯამებელი ოქმი. მაჟორიტარული საარჩევნო სისტემით ჩატარებული არჩევნების შედეგების მიხედვით.

კომისიის ყველა წევრი (განსხვავებული აზრის გამოთქმის შემთხვევაშიც კი) ხელს აწერს ოქმს, რითაც დასტურდება მათი ყოფნა საარჩევნო უბანში. ოქმი უნდა დამოწმდეს კომისიის ბეჭდით.

თუ საუბნო საარჩევნო კომისიის წევრი არ ეთანხმება ოქმში შეტანილ მონაცემებს, მას უფლება აქვს ჩანაწერი გააკეთოს შემაჯამებელ ოქმში „განსხვავებული აზრის“ გრაფაში და მოაწეროს ხელი. თუ შემაჯამებელი ოქმის შევსებისას დაშვებულ იქნა შეცდომა, მის გამოსასწორებლად შემაჯამებელ ოქმში, შესაბამისი მონაცემის გასწვრივ, მაშინვე კეთდება წარწერა „შესწორებულია“. საარჩევნო კომისია ადგენს შესწორების ოქმს. ამ ოქმს ხელს აწერს კომისიის ყველა დამსწრე წევრი, ოქმს დაესძვება კომისიის ბეჭედი გატარდება კომისიის სარეგისტრაციო ჟურნალში და დაერთება იმ შემაჯამებელ ოქმს, რომელშიც შეტანილი იქნა შესწორება.

საუბნო საარჩევნო კომისიის მდივანი არსებული მონაცემების მიხედვით ავსებს შემაჯამებელ ოქმს. კენჭისყრის შედეგების შემაჯამებელი ოქმი (კომისიის წევრთა თანდართული განსხვავებული აზრებით) ბიულეტენებისა და ამომრჩეველთა სიების დალუქულ პაკეტთან ერთად დაუყოვნებლივ გადაეცემა საოლქო საარჩევნო კომისიას.

თუ კენჭისყრის შენობაში არის ფაქსი, კომისიის თავმჯდომარე შემაჯამებელი ოქმის ასლს აგზავნის ცესკოში.

საუბნო საარჩევნო კომისია შემაჯამებელი ოქმის ასლს (კომისიის წევრთა თანდართული განსხვავებული აზრებით), მისი მოთხოვნის შემთხვევაში დაუყოვნებლივ გადასცემს პარტიის/საარჩევნო ბლოკის წარმომადგენლებს და დამკვირვებელი ორგანიზაციის დამკვირვებლებს. ოქმის ასლი უნდა დამოწმდეს საუბნო საარჩევნო კომისიის ბეჭდით და საუბნო საარჩევნო კომისიის თავმჯდომარისა და მდივნის ხელმოწერით. (ამ ოქმის დამოწმებული ასლების იურიდიული ძალა ისეთივეა, როგორც საუბნო საარჩევნო კომისიის შემაჯამებელი ოქმისა).

კომისიის მდივანმა სარეგისტრაციო ჟურნალში რეგისტრაციაში უნდა გაატაროს გაცემული საარჩევნო დოკუმენტაცია და გაცემული ოქმების ქსეროასლებს მიანიჭოს რეგისტრაციის ნომერი. ოქმის მიღება წარმომადგენელმა/დამკვირვებელმა ჩანაწერთა წიგნში ხელმოწერით უნდა დაადასტუროს.

საუბნო საარჩევნო კომისია ვალდებულია უზრუნველყოს ოქმის ასლის გამოკვრა საჯარო გაცნობისათვის.

XIV. საუბნო საარჩევნო კომისიის მიერ საოლქო საარჩევნო კომისიისთვის საარჩევნო დოკუმენტაციის გადაცემა

კომისიის მდივანი გადაითვლის ჩანაწერთა წიგნის შევსებულ გვერდებს და ბოლო შევსებულ ან მის მომდევნო გვერდზე მიუთითებს შევსებული გვერდების რაოდენობას, წიგნის დახურვის თარიღსა და დროს, აწერს ხელს და დაუსვამს საუბნო საარჩევნო კომისიის ბეჭედს. საუბნო საარჩევნო კომისიის თავმჯდომარე და კომისიის წევრები იმავე გვერდზე ხელმოწერით ადასტურებენ ჩანაწერთა წიგნის დახურვის ფაქტს.

კომისიის მდივანი სარეგისტრაციო ჟურნალის ორივე ნაწილში უკანასკნელი ჩანაწერის შემდეგ აკეთებს წარწერას: „ჟურნალი დახურულია“, მიუთითებს თარიღს, ზუსტ დროს და მოაწერს ხელს.

ჩანაწერთა წიგნი, საუბნო საარჩევნო კომისიის სარეგისტრაციო ჟურნალი და განცხადებები (საჩივრები) იკვრება და ილუქება ერთ პაკეტად. შეკვრას დაეწერება საარჩევნო დოკუმენტაციის სახეობა, საარჩევნო ოლქის და უბნის ნომერი. შეკვრას ხელს აწერენ მთვლელები

და კომისიის თავმჯდომარე. აღნიშნული შეკვრა სხვა დალუქული დოკუმენტაციისგან განცალკევებით წარედგინება საოლქო საარჩევნო კომისიას.

რეგისტრატორების ბეჭდები და კომისიის ბეჭედი ილუქება; შეკვრას დაეწერება საარჩევნო დოკუმენტაციის სახეობა, საარჩევნო ოლქის და უბნის ნომერი. შეკვრას ხელს აწერენ მთვლელები და კომისიის თავმჯდომარე.

ცალ-ცალკე შეკრული საარჩევნო დოკუმენტაცია იდება დიდ ტომარაში, რომელიც ჰერმეტიკულად იკვრება. ტომარას დაეკრობა ფურცელი შესაბამისი საარჩევნო ოლქისა და უბნის სახელწოდებისა და ნომრის მითითებით და წარედგინება საოლქო საარჩევნო კომისიას.

საარჩევნო დოკუმენტაციას საოლქო საარჩევნო კომისიაში წარადგენს საუბნო საარჩევნო კომისიის თავმჯდომარე და კომისიის სხვა წევრებიდან წილისყრით გამოვლენილი კომისიის ორი წევრი.

საოლქო საარჩევნო კომისიაში საუბნო საარჩევნო კომისიის მიერ საარჩევნო დოკუმენტაციის გადაცემისას, დგება მიღება-ჩაბარების აქტი, სადაც მიეთითება საარჩევნო დოკუმენტაციის სახეობა და რაოდენობა. აქტს ხელს აწერენ საარჩევნო დოკუმენტაციის გამცემი და მიმღები პირები და თითოეულს გადაეცემა აქტის თითო ცალი.